

Dess iss su in uns droi

Letzde Freidaach unn weil isch allsfort de Fraa im Weesch gestonne habb bei ihrer Friejhohrsaktion mett Oomersche, Spüli im Wasser unn Fensderledder, habb isch gesaad: Isch muss emol e bissi onn die frisch Luft, isch kann dess Butzzeisch nitt rische.

Doo seetse: Holl merr grad noch die Stehlaader außem Keller unn donn konnsde gieh. Hosde aach Geld debei?

Ei Geld, ferr was donn? habb isch su gedue als wisst isch nitt wasse wollt.

Isch moon joo nor, dassde villeischd zufällisch, awwer werklisch rein zufällisch beim Joffche vorbeigiehst unn e Biersche drinke willst.

Isch habb merr ebbes in de Bart gebrummeld, habb die Laader geholld, moin Jack genumme unn bin e bissje spaziern gonge. No ja, unn so rein zufällisch bin isch joo aach werklisch beim Joffche gelond, unn wie isch donn onn de Thek gestonne unn grad e Bier bestelld habb, gieht die Dier uff unn de Schorsch kimmt eroi. Gude sesomme, hodder gesaat unn stellt sisch newer misch, was dusden du hier omm friehe Moie?

Grad dessellwe wie du, habb isch gesaat, bissde aach stifte gonge weeschem Friejhohrsbutz?

De Schorsch hott sisch en Gespritzte bestellt unn genickt: Doo mächt se alls doorum, schennt: Gieh merr aus de Fieß! – unn wonn isch ebbes helfe will, brummeld se: Was willsden du merr helfe? Doo hau isch liewer ab.

Ja, habb isch gemoond, isch habb moiner noch die Laader außem Keller geholld unn donn bin isch gonge, dess iss su gefährlich wenn die onn dene grüße Fensder erumklettert, doo habb isch immer Ängst, die fällt erunner, isch kann dess nitt seh unn gieh liewer fort.

De Schorsch grinst: Mir Männer sinn halt gons empfindlich, mir kenne koo Blut seh. Donn seeder noch: Du Honnes, warum mache die dess?

Isch numm enn grüße Schluck unn zuck die Achsele: Dess meddem Friejhohrsbutz? – dess waaß isch aach nitt. Isch habb moi emol gefroochd unn doo seetse: Dess hott moi Mudder su gemachd unn dere ihr Mutter unn wie isch unser Döschder kenn, mache die dess aach su.

Moont de Schorsch: Isch denk monschmol, dess lieht in de Fraue droi. Weil dess sinn noch su heidnische Bräuch, dess geheerd zum Winderausdreiwe unn dass dess Licht widder in die Heiser kimmt, irschend su ebbes.

Ja, saach isch, dess lieht in de Fraue droi, seid zehndausend Johr.

De Schorsch druff: Unn bei uns Männer lieht droi, dassmerr dess nitt sehe könne unn abhau. Seit zehndausend Johr? Honnes, doo fällt merr grad ebbes oi.

Isch frooch: Ei was donn, Schorsch?

De Ötzi!, seet de Schorsch. Die wisse joo aach nitt, warum der uff de Bersch gekletterd iss. Villeischd iss der aach ...?

Moonsde? habb isch gesaat unn noch e Bier bestellt, moonsde werklisch?

De Schorsch nickt: Wennse genau gugge wernse feststelle, dasses Friehjohr war wo der Ötzi gestorwe iss, weil doo wernse au-ßer Höhlestaab aach Bliedestaab in dem soim Hoor finne. Isch glaab, der konnt aach nitt seh, wenn die Wohnhöhl gebutzd werred unn iss ab.

Prost Schorsch, habb isch gesaat, dess misse merr mol de Zeitung schreiwe. Awwer uns giehts besser, mir misse nitt de Bersch enuff. Unn wonn merr hier beim Joffche umfalle, liehn merr wenschdens im Warme.

Eiern Honnes